



Groupe parlementaire

N°409  
Entrée le 01.03.2024  
Chambre des Députés  
Déclarée recevable  
Président de la Chambre des Députés  
(s.) Claude Wiseler  
Luxembourg, le 04.03.2024

Här Claude Wiseler

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, den 1. Mäerz 2024

Här President,

esou wéi d'Chambersreglement et virgesäit, bieden ech lech, dës parlamentaresch Fro un den Här Aarbechtsminister weiderzeleeden.

De 5. Februar gouf den Direkter vun der Beschäftigungsinitiative ProActif SIS S.à.r.l. (fréier ProActif A.S.B.L.) während engem Krankeschäin duerch de President vum Verwaltungsrot entlooss. D'Decisioun gouf mat enger verbaler a quasi physischer Aggressioun vum Direkter vis-à-vis vum President begrënnt. Kuerz dorop huet den LCGB ugekënnegt, op Basis vun de selwechte Virwërf eng Ausschlossprozedur géint den Direkter ze lancéieren.

D'Rechtméissegkeet vun där Decisioun steet awer verschiddene Presseartikelen no méttlerweil op dënnem Äis. Eegener Ausso no hat de betraffenen Direkter, esou wéi de Code de travail et virschreift, den Dag selwer ugeruff fir sech krankzeschreiwen an och de Certificat vum Dokter ageschéckt, sou datt hien u sech ënnert de gesetzleche Kënnegungsschutz vum Krankeschäi fält. Weider wier, dem Kollektivvertrag no, virun all Entloossung och e Gespréich mam Betraffene virgesinn, eng Obligatioun, déi aus dem Artikel L.124-2 vum Code de travail ervirgeet. Weider heescht et an der Press, datt dës Decisioun vum Verwaltungsrot vu ProActif hätt misse gestëmmt ginn, mee datt de Gremium amplaz just nodréiglech informéiert gi wier. Méttlerweil hunn och verschidde Membere vum Verwaltungsrot dem Direkter, wéi et schéngt, weiderhin hiert Vertrauen ausgeschwat. Obwuel den Direkter selwer nach formell Member vum Verwaltungsrot ass, gouf hien och net an d'Reunioun, déi sech mat sengem Fall befaasst huet, invitéiert, fir seng Perspektiv ze presentéieren.

Doriwwer eraus gëtt d'Substanz vun de Virwërf méttlerweil an Zweiwel gezunn. Sou wollt de President op Nofro hin anscheinend net méi op Detailer iwwert de Virfall agoen an och Aussoe vun Zeie goufen aus Dateschutzgrënn op eemol zeréckbehalen. Weider gouf och dem Direkter säin Zougang zu sämtlechen déngschtlechen, elektronischen Apparater gespaart, sou datt hie méiglecherweis net méi op wichteg Dokumenter kann zeréckgräifen, déi säi Fall betreffen. Am Gespréich mam RTL-Journal huet hien dann och virun der Kamera sämtlech Virwërf zeréckgewisen an amplaz selwer Virwërf vu schwéiere verbalen Aggressiounen bis hin zum Mobbing, géint de President erhuewen.

Déi verschidde Beschäftigungsinitiative gi vum Här Aarbechtsminister sengem Haus mat insgesamt 25 Milliounen Euro d'Joer ënnerstëtzt. De Ministère huet an deem Kader och e Sëtz am Verwaltungsrot vu ProActif ze gutt. Den entsprechende Vertrieeder konnt, der Press no, wéinst sengem Congé awer net un där entsprecher Sëtzung deelhuewen. Den Här Minister selwer hat anscheinend eng perséinlech Entrevue mam Betraffenen ugekënnegt, deen elo – jiddefalls bis de komplizéierte Fall eng Kéier gekläert ass – mat engem groussen Imageschued ze kämpfen huet. Hien huet dës Ausso awer méttlerweil zeréckgezunn.

Et ass net déi éischte Kéier, datt ProActif negativ an d'Schlagzeile geréit. 2011 hat en Audit fir d'Joren 2005-2010, dee vum deemolegen Aarbechtsminister, dem Här Nicolas Schmit,

lancéiert gouf, e schlechten Émgang mat Steiersuen a Milliounenhéicht un d'Liicht bruecht. An der Conclusioun huet et geheescht, datt déi Suen zeréckbezueelt sollte ginn. Ewéi den deemolegen Aarbechtsminister, den Här Dan Kersch, an der Äntwert op meng parlamentaresch Fro Nr. 2017 aus der Legislaturperiod 2018-2023 geäntwert hat, war dat bis dato net geschitt an den Här Minister Kersch hat seng Zerwisser eegener Ausso no ugewisen, en neie Plan de remboursement mat ProActif auszuhandelen.

An deem Zesummenhang géif ech dem Här Aarbechtsminister gär dës Froe stellen:

- 1) Wéi reagiert den Här Minister op d'Virgäng ronderëm d'Entloossung vum Direkter vu ProActif? Kann den Här Minister an deem Zesummenhang preziséieren, wéi eng Konsequenzen hien aus der Tatsaach zitt, datt déi entspriechend Reunioun vum Verwaltungsrot op en Dag geluecht gouf, op deem de Vertrieder vu sengem Haus d'office verhënnert war?
- 2) Wéi begrënnt den Här Minister seng Decisioun, déi ugekënnegt Entrevue mam betreffenen Direkter zeréckzezéien?
- 3) Kann den Här Minister matdeelen, wéi eng Modalitéiten an deem 2020 annoncéierte Plan de remboursement festgehale goufen an ob dës bis ewell vu Säite vun der fréierer A.S.B.L. respektéiert goufen? Wier den Här Minister bereet, der Chamber déi entspriechend Dokumenter zoukommen ze loosse?
- 4) Kann den Här Minister eng Tabell presentéieren, wéi eng Zomm ProActif am Kader vun der Ënnerstëtzung vun de Beschäftegungsinitiativen an de Joren 2012 bis 2023 jeeweils zoukomm ass, a preziséieren, ob d'Verwendung vun deenen entspriechende Beträg opgrond vun den Erfarungen aus dem Joer 2011 systematesch auditéiert gouf? Falls net, firwat net?

Mat déiwem Respekt,



Jeff Engelen  
Deputéierten



LE GOUVERNEMENT  
DU GRAND-DUCHÉ DE LUXEMBOURG  
Ministère du Travail

**Réponse du ministre du Travail à la question parlementaire n° 409 de Monsieur le Député Jeff Engelen**

**Ad. 1**

D'Entloossung vum Direkter ass eng intern Personaldecisioun vun ProActif SIS S.à r.l.. Et gëtt keng Dispositioun an den „Conventions de coopération“ déi de Beschäftigungsinitiative virschreiw, ween si astellen, respektiv ween si entloossen.

De Verrieder vum Aarbechtsministère ass just als Observateur bei de Reuniounen vum Conseil de gérance vu ProActif SIS s.à.r.l. dobäi. Vu dat hien kee Stëmmrecht huet, hätt seng Präsenz keen Afloss op d'Decisioun kënnen hunn, deemno sinn op deem Punkt keng Konsequenzen vum Minister ze zéien.

**Ad. 2**

Den betroffenen Direkter hat bis dohinner keng Entrevue vum Minister versprach kritt, deemno konnt déi och net zrëckgezunn ginn.

**Ad. 3**

Obwuel 2020 ee Plan de remboursement annoncéiert gouf, gouf a béider Averstännis an op Grond vun der deemoleger ekonomescher Situatioun vun der fréierer A.s.b.l., ee sougenannten „Plan d'investissement“ opgestallt, dee virgesäit, dass déi fälleg Zomm sollt investéiert ginn a soumat d'Weiderbestoe vun der Initiativ garantéiert sinn, déi als Haaptmissioun hunn d'Leit eng zweet Chance ze ginn, si ze stabiliséieren an ze forméiere fir dës, am Idealfall, erëm op den éischten Aarbechtsmarché ze kréien.

Dësen „Tableau d'investissement“ gëtt eis all Joer matgedeelt an den zoustännege Service um Ministère iwwerpréift, dass d'Suen och fir déi uewen genannte Missioun gebraucht gi sinn.

Op Grond vun der Vertraulechkeet vun dësen Donneeën, déi der S.à r.l. gehéieren, ass den Aarbechtsminister der Meenung, dass et him net zousteet den deementspreechenden Tableau öffentlech zougänglech ze maachen.

**Ad. 4**

D'Zommen, déi ProActif A.s.b.l. respektiv ProActif SIS S.à r.l. an de Joren 2012 bis 2023 am Kader vu sengem Konventionnement als Beschäftigungsinitiativ kritt hunn, sinn déi folgend :

<b>Année</b>	<b>Subvention effective* (EUR)</b>
2012	12.220.401
2013	12.944.636
2014	14.079.099
2015	15.606.684
2016	15.772.472
2017	16.639.819
2018	16.858.121
2019	17.477.180
2020	18.795.374
2021	20.674.383
2022	22.021.752
2023	24.073.901

\*) Subvention due suivant le décompte final

Esou wéi d'Gesetz et virgesäit, kritt all Beschäftigungsinitiative hir Konventioun, Joer fir Joer, sur Demande erneiert.

Am Kader vun der „Convention de coopération“ hunn d'Beschäftigungsinitiativen eng Obligatioun hir Konten all Joer vun engem agréierten Reviseur d'entreprises kontrolléieren ze loossen, dëst onofhängeg vun de legalen Obligatiounen, déi mam jeeweilege Statut (A.s.b.l., Société coopérative, S.à r.l. etc.) vun der Beschäftigungsinitiativ verbonne sinn.

Zousätzlech kann de Ministère Kontrollen op der Plaz an op Dokumenter duerchféieren, wat am Hierscht 2023 gemaach gouf, esou wéi et am Artikel 82 vum ofgeännerte Gesetz vum 8. Juni 1999 iwwert de Budget, d'Comptabilitéit an d'Tresorerie vum Staat virgesinn ass.

Ee sougenannte Pré-Rapport gouf vum zoustännege Service am Ministère erstellt an der S.à r.l. pour Prise de position zoukomme gelooss. Zanter Ufank Mäerz läit hir Stellungnahm zum Pré-Rapport fir, a gëtt elo vum uewe genannte Service analyséiert.

Fir e spezifeschen, externen Audit huet op Basis vun de Resultater vun der Kontrollprozedur bis ewell keen Ulass bestanen.

Luxembourg, le 29 mars 2024

**(s.) Georges MISCHO**  
**Ministre du Travail**